

**Date – 26/04/2026**

**Time - 18:30 -18:40Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES ( EVENING )**

1. Naktuk zing dar 8 atanga Aizawl Municipal Corporation inthlanna a vote tlate chhiar tan turin engkim peih fel a ni tawh.
2. Zirtawpni zan atanga tan, Presbyterian kohhran Mizoram Synod hnuai bial inkhawmpui hman mekah kohhran mi harsa zualte MUHCS a inziaklut tura tanpui an nih thu tarlan a ni.
3. Sports Minister Pu Lalnghinglova Hmar-in Olympic 2036 thlir chungahmalakna-ah Olympic medal beiseiawmna discipline te thlur binga duat bik an ngai tih a sawi.
4. Prime Minister Narendra Modi-a'n Chhiarpui 2027 neih mek chu khawvela chhiarpui lian ber a ni tih sawiin mi tinin an ngaipawimawh tur a ni, a ti.



**AMC VOTE COUNTING**

Naktuk zing dar 8 atanga Aizawl Municipal Corporation (AMC) inthlanna a vote tlate chhiar tan turin engkim peih fel a ni tawh.

State Election Commissioner Dr. H. Lalthlangliana'n Akashvani News Aizawl a hrilh danin April ni 21-a AMC ward 19-a inthlanna a vote tlate bakah mahni in luma vote thlakte leh inthlanna a duty-te vote thlak hi a vaiin Aizawl Bawrhsap Pisapui-ah chhiar a ni dawn a. Counting Hall 4-ah vote hi chhiar a ni ang a. Counting Hall 2-ah vote chhiarna dawhkan 10 ve ve awmin Counting Hall 2 dangah vote chhiarna dawhkan 8 ve ve a awm bawk ang. Vote chhiartu tur (counting official) zawng zawng chu vote an chhiarna hmunah zing dar 7 a thleng vek tura hriattir an ni a. Dar 8-ah vote chhiar tanin upa, rualban lo leh hrisel lohna avanga mahni in luma vote thlak mi 2,594-te leh inthlan duty avanga vote thlak ni hma a vote lo thlak tawh mi 1,328 te vote chhiar hmasak a ni anga, Chumi zawhah electronic voting machine (EVM) a vote tla nuai 1, sing 5 leh 640 te chhiar zui nghal a ni ang.

Dr. H. Lalthlangliana chuan vote chhiarna hmunah hian venhimna khauh taka kenkawh a nih tur thu a sawi a. Vote chhiartu turte chu hmanhmawh lova, felfai leh sawisel tur awm lova an hna hlen chhuak tura hrilh an nih thu a sawi bawk.

AMC inthlanna-a candidate 68-te dinhmun chu naktukah hian tihchian a ni dawn ta a. Puan tawh thin angin AMC inthlan hi rorel lai ZPM, bakah MNF leh MPCC te chuan bial 19 an chuh kim vek a. BJP chuan bial 11-ah candidate an nei a. Independent candidate an awm lova. AMC ward 19 zinga 6 chu hmeichhe tan chauha chuh theih tura ruat ni mah se, tu pawhin a chuh theih bialah hmeichhe candidate 7 an awm ani. Tun tum AMC inthlan chuhtu mi 68 zinga 28 te chu hmeichhia niin, INC leh ZPM-ah hmeichhe candidate 9 ve ve, MNF-ah 7 leh BJP-ah 3 an awm a ni.



### OLD AGE PENSION

Lunglei District Social Welfare & Tribal Affairs chuan National Social Welfare Programme (NSAP) hnuaiia ruahmanna hrang hrang zingah tar leh hmeithai chawmna an buaipui chho zel.

Lunglei District Social Welfare Officer (DSWO) Pu CL. Joseph-a'n a sawi danin NSAP hnuaiiah hian tar pension an tih mai, kum 60 chin chung lam tan Indira Gandhi National Old Age Pension Scheme-ah pension la mi 3,643 an awm a, thla tin Rs 1,200 pek an ni a, Kum 80 chunglam te chu Rs 1,500 pek an ni, a ti. Hei bakah hian hmeithai pension an tih mai Indira Gandhi National widow Pension Scheme hnuaiiah mi 310 pension la awm mekin kum 40 chin, an pasalin a thihsante'n pension hi an la in an dil thei a, thla tin Rs 1,300 an dawng niin a sawi a. Vohbik pension an tih mai, Indira Gandhi National Disability Pension Scheme-ah pension la mi 99 an neih thu leh, thla tin Rs 1,300 an dawng a, kum 80 chinah chuan thla tin Rs 1,500 pek an ni tih a sawi.

National Family Benefit Scheme (NFBS) pawh chhungkua a eizawngtu ber an thihin a dil theih a, hei hi chu vawi khata pek tlak tur niin kum khatah mi 30 thlan chhuah te hnenah Rs 20,000 zel pek tur an ni a. Bawrhsap pisa lam bakah MUP, MHIP leh YMA te'n an thlan tur a ni tih sawiin State Disability Pension Scheme hnuaiiah beneficiary 25 an neih thu leh thlatin Rs 500 (kum khatah Rs 6,000) pek an nih thu a sawi baw.

April ni 22 atanga ni 24 April chhunga Health & Family Welfare Deptt nen tangkawpa vohbikte tan Disability Certificate/UDID Assessment & Certification Camp Bunglei, Lungsen leh Tlabung RD Block huam chhunga an buatsaiha vohbik mi 303 te chu Disability Certificate/UDID pe chhuak tura endik an ni a. Vohbikte zinga Aadhaar siam that (update) ngaite an siam thatsak baw a ni.

Zirtawpni zan atanga tan, Presbyterian kohhran Mizoram Synod hnuaiia bial inkhawmpui hman mekah kohhran mi harsa zualte MUHCS a inziaklut tura tanpui an nih thu tarlan a ni.

Bial Inkhawmpui-ah hian Kohhran hrang hrang report-ah Kohhran member harsatna avanga Mizoram Universal Health Care Scheme (MUHCS)-a inziaklut te an puih thutarlan ani. Kohhran hrang hrang Secretary ten an kohhran hmalakna an report zingah MUHCS-a an kohhran member inziahluhna tur sum nei lo te an puih thu an sawi a. Kohhran thenkhat chuan puangzar lem loin puih ngai an puih mai thu an sawi bawk a ni. Hei hi thla hmasa ni 25-a Mizoram Synod lehkhah chhuak bawhzuina a ni a. Mizoram Synod Secretary Rev. B. Zohmangaiha'n Kohhran tin Secretary te lehkhah a thawnah hian MUHCS zawm ve chungchang Synod Officer's Meeting (OM) in ngun taka a ngaihtuah thu tarlangin Kohhran hoah an member te retheihna avanga zawm ve thei lo, harsa zualte Kohhranin an zawm ve theihna tur hma lak sak turin ngenna siam ni se tia rel a nih thu a tarlang a. OM thuchhuak ang hian Kohhranhote an inngen thu tarlangin hei hi mi harsa zawkte tanpui theihna kawng a nih avangin a theih anga tihhlawhtlin ni se tih Kohhran tin Secretary te lehkhah a thawnah hian a tarlang tel bawk a ni.

Zirtawpni zan kha inkhawmpui palai lawmna leh Report Inkhawm atan hman a ni a. Nimin nileng khan rolrel a ni a,. Vawiin Chawhnu inkhawmah Lalpa Zanriah Sakramen theh a ni a, zan inkhawmah Bial Chairman kalchhuak turten Valedictory Sermon an sawi ang. Pathian Biak Inkhawm hun hrang hrangah thupui sawi tura ruatten thuchah an sawi bawk dawn a, zanin hian pastor bial inkhawmpui hi a tiak dawn a ni.



**MIZO JEWS**

Mizoram mi Israel hnam bo ni nia inchhal mi 240 chuangte chuan Zirtawpni zing dar 12 leh a chanve vel khan Tel Aviv-a Ben Gurion tumhmun an thleng.

‘Mizo Juda’ ti a sawi, anmahni chuan ‘Bnei Menashe’ tia insawite hi Mizoram leh Manipur atangin mi 300 ve ve kumina Israel a pem thawh khatna-a pem thla tur an nih laiin hriselna leh harsatna dang vangte, passport fel loh vangte-in Mizoram atang hian mi 240 vel chauh an thleng thla thei a. Mi tlem te Delhi-ah la cham bangin tunkar chho hian Israel an thlen thlak ve theih beisei a ni . Manipur atanga pem thla turte pawh an chhuk ve theih thuai beisei a nih thu pem thla zing ami pakhat chuan a sawi. Israel a pem thla turte thlang tur hian nikum December ni 1 leh ni 10 inkar khan Israel atanga lokal Juda puithiam (Rabbi) 9 leh Jewish Agency for Israel bakah Delhi a Israel Embassy atangin mi thahnem tak an lokal a. February thla emaw March thla emaw a pem thlak inbeisei tawh kha West Asia indona a chhuah tak avangin an khawtlai ta a ni.

Israel leilung an zu rah hian Israel Immigration Minister leh official ten airport-ah mi tharte hi an lo hmuak a, Bnei Menashe community Israel an thleng chu an ram chanchina thil chhinchhiah tlak tak a nih thu Israel Immigration Minister chuan a sawi. An zinga tel ve Aizawl mi pakhatin Akashvani News a hrilh danin an thlen rual rual hian Israel khua leh tui nihna leh hnathawh phalna an lo pe nghal. Nazareth velah an awm dawn niin a sawi a ni.



## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



## SPORTS MINISTER

Sports Minister Pu Lalnghinglova Hmar chuan Olympic 2036 thlir chung a hmalakna chuan sports discipline zawng zawng a huam thei dawn lo tih sawiin Olympic medal beiseiawmna discipline te thlur binga duat bik an ngai a ti.

Ram pum a Sports Minister te inkhawmpui, 'Chintan Shivir of Ministers of Youth Affairs and Sports of States/UT nimin leh vawiina Srinagar-a Sher-i-Kashmir International Conference Centre a (SKICC) neihah he thu hi Sports Minister chuan a sawi a. Indian sports kalphung inthlak mek chu lawmawm a tih thu sawiin India ram chu a kal dan ngai renga a kal chuan result pawh a ngai reng dawn a ti a, hmasawn tur chuan thlak ngai a awm thin a ti. Sports Minister chuan Sports Authority of India siam that tul a tih thu sawiin Delhi atanga thutlukna siam mai loin state hrang hranga sports official leh association te zin chilh thin turin sawrkar laipua sports hotute chu a sawm a ni.



## AEROSPORTS

Mizoram Aerosports Association President Pu J. Vanlalliana chuan nimin khan Paragliding Pilot Training chu Champhai Tlangsam khaw daia Dr. Pika tuikhuah tlang-ah a hawng.

Pu J. Vanlalliana chuan Champhai District Aerosports Association chu naupangte, kum kalta maia din ni mahse pawl chak tak an nih thu sawiin , chumi zarah chuan tunah pawh Paragliding Pilot Training buatsaih theih ani ati. Paragliding Pilot ni tura tranning-a tel te chu an vanneih thu leh mi tam takin an theih ve loh a nih thu tarlangin he training hian Champhai tan rahbi thar pawimawh tak a hunchhuah a beisei ani ati.



## MANN KI BAAT

Prime Minister Narendra Modi-a'n chhiarpui neih mek chu khawvela chhiarpui lian ber a ni tih sawiin mi tinin an ngaipawimawh tur a ni, a ti.

Vawiin Akashvani-a Mann Ki Baat hun a hmanna-ah he thu hi sawiin Pu Modi-a chuan Chhiarpui 2027 chu digital-a kalpui a ni, a ti a, in tin luh chhuaka chhiarpui hna thawktu, enumerator-te chuan thil pawimawhte chu mobile app-ah an dah lut nghal zel a ni, a ti. A duh zawk tan online atangin mahni chanchin dah luh theih anih avangin chhiarpui hna a awlsam pah tih sawiin enumerator-te thlen hma ni 15-ah

inziahluh theihna portal hi hawn a ni, a ti a, a tul zawng zawng ziah luh hnuah an mobile ah emaw email ah emaw special ID a thleng ang tih sawiin hetianga tih hian hun leh tha tam tak senna tur a tih tlem phah a ni, a ti.

